

Ո Ր Ո Շ ՈՒ Մ

Ճանապարհային ոստիկանության վարչական իրավախախտման գործով 27.09.2021թ. կայացված ԱՖ778838 որոշումն անփոփոխ, իսկ վարչական բողոքն առանց բավարարման թողնելու մասին

<<19>> 11 2021թ. 7-13- 17500

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս, վերանայելով Արա Տիտանյանի ՄԴ/87195-21 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Երևան քաղաքի, Տպագրիչների փողոցի, 5ա շենքի, 6 բնակարանի բնակիչ Արա Տիտանյանը դիմումով խնդրել է բեկանել Ճանապարհային ոստիկանության վարչական իրավախախտման գործով կայացված ԱՖ778838 որոշումը՝ նշելով իր անհամաձայնությունը:

Վերջինս Ճանապարհային ոստիկանության վարչական բողոքների քննության բաժնում իր կողմից տրված գրավոր բացատրությամբ պնդել է դիմումում նշած հանգամանքները և պահանջել գրավոր պատասխան:

Դիմումի քննարկման արդյունքում պարզվել է, որ վարչական իրավախախտման գործով կայացված ԱՖ778838 որոշումը ենթակա է կատարման հետևյալ պատճառաբանությամբ.

Վարչական իրավախախտումների վերաբերյալ ՀՀ օրենսգրքի 126-րդ հոդվածի 1-ին մասի համաձայն տրանսպորտային միջոցները ոչ սթափ վիճակում վարելը, եթե վարորդը միայն ալկոհոլի ազդեցության տակ է, և զանցանքը չի պարունակում սույն հոդվածի երկրորդից հինգերորդ մասերի հատկանիշները՝ առաջացնում է տուգանքի նշանակում՝ սահմանված նվազագույն աշխատավարձի հարյուրիսնապատիկի չափով: **Նույն հոդվածի 2-րդ մասի համաձայն՝ սույն հոդվածի առաջին մասով նախատեսված արարքը կատարելը, եթե վարորդի արյան մեկ լիտրի մեջ մաքուր ալկոհոլի պարունակությունը գերազանցում է 1 գրամը կամ եթե նրա մեկ լիտր արտաշնչած օդի մեջ մաքուր ալկոհոլի պարունակությունը գերազանցում է 0.5 միլիգրամը՝ առաջացնում է տրանսպորտային միջոցներ վարելու իրավունքից զրկում՝ մեկ տարի ժամկետով:** Նույն հոդվածի 9-րդ մասի համաձայն՝ սույն օրենսգրքով նախատեսված դեպքում անձը համարվում է ոչ սթափ վիճակում գտնվող, եթե ստուգմամբ պարզվում է, որ նրա մեկ լիտր արյան մեջ մաքուր ալկոհոլի պարունակությունը 0.2 գրամից կամ մեկ լիտր արտաշնչած օդի մեջ 0.1 միլիգրամից ավելի է, կամ եթե անձի արյան կամ մեզի մեջ առկա է թմրամիջոցի կամ հոգեմետ (հոգեներգործուն) նյութի պարունակություն:

Ուսումնասիրությամբ պարզվել է, որ 27.09.2021թ. ժամը 00:50-ի սահմաններում ուժեղացված ծառայության ժամանակ Դիլիջան քաղաքի Կամոյի փողոցում Արա Տիտանյանի վարած <<TOYOTA>> մակնիշի 10 SS 110 հաշվառման համարանիշի ավտոմոբիլը կանգնեցվել է Ճանապարհային ոստիկանության ՃՊԾ 2-րդ սպայական գումարտակի, 4-րդ սպայական վաշտի, 2-րդ սպայական դասակի տեսուչներ Ա.Աստանյանի և Ա.Սահակյանի կողմից: Վարորդի սթափության վիճակի ստուգմամբ պարզվել է, որ վերջինիս կողմից արտաշնչած մեկ լիտր օդի մեջ ալկոհոլի պարունակությունը կազմել է 0,611 մգ/լ, այսինքն վարորդն ավտոմոբիլը վարել է՝ գտնվելով ոչ սթափ վիճակում: Տեսուչ Ա.Աստանյանի կողմից կազմվել է համապատասխան արձանագրություն և կայացվել է վարչական իրավախախտման գործով ԱՖ778838 որոշումը՝ Արա Տիտանյանին Վարչական իրավախախտումների վերաբերյալ ՀՀ օրենսգրքի 126-րդ հոդվածի 2-րդ մասով վարչական պատասխանատվության ենթարկելու մասին:

Տեսուչների կողմից տրված պարզաբանման համաձայն՝ դիմումատուին պատկանող <<TOYOTA>> մակնիշի 10 SS 110 հաշվառման համարանիշի ավտոմոբիլը կանգնեցվել է ուժեղացված ծառայության շրջանակներում, ինչպես նաև վարորդի սթափության վիճակի գնությունը անցկացվել է <<Jupiter>> տեսակի թիվ 858605 գործարանային համարի <<Ալկոտեստեր>> սարքով, որի արդյունքում պարզվել է, որ վարորդի 1լ արտաշնչած օդի մեջ ալկոհոլի պարունակությունը կազմել է 0.611 մգ/լ: Ա.Աստանյանի կողմից կազմվել է համապատասխան արձանագրություն և կայացվել ԱՖ778838 որոշումը: Ոստիկանության ծառայողները նշել են, որ իրենց և վարորդի միջև ծառայողական բնույթի խոսակցություններից բացի այլ խոսակցություններ տեղի չեն ունեցել, ինչպես նաև ներկայացրել է <<Ալկոտեստեր>> սարքի ստուգաչափման մասին թիվ 038851 վկայականը, որն ուժի մեջ է 27.10.2020թ.-ից մինչև 27.10.2021թ.: Բացի այդ <<Jupiter>> տեսակի թիվ 858605 գործարանային համարի <<Ալկոտեստեր>> սարքը ստուգաչափված է Հայաստանի Հանրապետության էկոնոմիկայի նախարարության <<Ստանդարտացման և չափագիտության ազգային մարմին>> ՓԲԸ-ի կողմից և դրանով արձանագրված սթափության աստիճանը կասկած չի առաջացնում:

<<Ճանապարհային երթևեկության անվտանգության ապահովման մասին>> օրենքի 17-րդ հոդվածի 1-ին մասի <<ա>> կետի համաձայն՝ Ճանապարհային երթևեկությունը կարգավորող ոստիկանության ծառայողը պարտավոր է սույն հոդվածի երրորդ մասով սահմանված կարգով ազդանշան տալով կանգնեցնել տրանսպորտային միջոցը, եթե՝ ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները, կամ տրանսպորտային միջոցի ընթացքը կամ տեղափոխվող բեռը, կամ վարորդը կամ ուղևորներն իրենց վարքագծով ակնհայտորեն վտանգ են ստեղծում երթևեկության անվտանգության համար:


Նույն հոդվածի 2-րդ կետի համաձայն սույն հոդվածի առաջին մասում նշված դեպքերից բացի, ոստիկանության ծառայողները կարող են տրանսպորտային միջոցները կանգնեցնել նաև Հայաստանի Հանրապետության ոստիկանության պետի կամ նրան փոխարինող անձի կողմից լիազորված հատուկ միջոցառումներ անցկացնելիս:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 126-րդ հոդվածի 2-րդ մասի հատկանիշները, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման գործով 27.09.2021թ. կայացված ԱՖ778838 որոշումը թողնել անփոփոխ, իսկ վարչական բողոքն առանց բավարարման.
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում.
3. Սույն որոշման օրինակն ուղարկել Արա Տիտանյանին և Ճանապարհային ոստիկանության ՃՊԾ 2-րդ սպայական գումարտակ:

Կատ.Գ.Մխոյան
Հեռ. 011-544-783



Ե. Կարապետյան